

欽定剿平粵匪方略

欽定勦平粵匪方略卷六十七 癸丑年

十一月初一日

壬寅

勝保奏言臣連日進攻賊勢

愈蹙時思竄逸嚴飭各路將弁加意防範二十
七日侵曉白霧迷漫恐逆衆乘勢逃竄卽於辰
刻督兵前進逆匪由東南擁出馬步二千餘人
我兵奮勇齊進殲斃一百餘名卽欲乘勝撲入
踏冰前進適值風沙陡起幾難開目冰質未堅

人馬易陷正在鏖戰之時賊馬數百由隄壓下
達洪阿在北列隊見賊擁出卽帶健銳各兵前
來接應從旁施放槍礮該逆大潰其西北賊兵
經右翼前鋒各軍及天津民勇殺斃四五十名
我兵撲至東南壘邊而還查此次逆賊乘風大
霧迷之際傾巢出拒意欲竄逸經我兵四路圍
攻頗爲得手惟追撲東南之兵因風沙過大陷

入冰坑致有損傷實堪憤恨現擬分兵三路剋日齊攻探明何路空虛併力攻入以冀早圖克復用竟全功

勝保又奏言二十九日卯刻臣督兵三路齊攻並將運到礮位向賊壘西面轟擊乘勢從南北兩路撲入該逆擁出千餘人死拒我兵奮力前進連環衝擊達洪阿亦帶健銳火器兩營官兵

隨後接應殲斃逆匪甚多臣又選派天津得力鄉勇馮玉德身懷火彈潛入賊壘逃出回營詢知賊營糧米已不甚多又經該勇黑夜乘風放火將其裝麥船焚燒七隻連日北風嚴寒臣已密派員弁前往查看如冰堅可行卽當調集兵勇乘其不備四面攻入使賊腹背受敵定可得手

同日戶部左侍郎王慶雲奏言逆賊困守獨流
經官兵四面合圍已成飛走俱窮之勢查該鎮
水路紛歧淺不及尺現在節逾小雪水澤腹堅
萬一該匪力窮西竄近畿難免震驚請

諭令帶兵大臣每兵一名隨帶鉸齒兩副密速製備以
便追剿均奏入

上命軍機大臣傳諭勝保曰逆匪竄踞靜海獨流經官

兵圍勦雖屢獲勝仗總未能掃數殲除朕心甚爲焦急著勝保激勵將士奮力攻擊務於十日之內殄滅賊氛毋再稽延該逆勢窮思竄尤須處處布置嚴行堵截現在天寒水凍到處可通若將要隘處所鑿冰斷道使賊匪無從奔脫勦辦更易得手鄉勇馮玉德能入賊壘探聽虛實又放火焚賊麥船甚有膽勇此等得力兵勇必當留心物色善用其長隨時存記賊

平後卽行加等保奏據稱賊匪糧食將盡並聞其火藥短缺正可乘賊窮蹙之際嚴斷接濟併力進攻據王慶雲奏現值河冰凍結請飭官兵製備鉸齒以便截擊等語著卽相機籌辦毋稍延誤

上諭內閣曰此次攻勦獨流逆匪達洪阿從旁施放槍礮先占必勝之勢進止合機奮勇尤堪嘉尙著傳旨嘉獎勝保督兵進勦屢獲勝仗賊勢窮蹙已極著卽

乘此聲威速殄羣醜將逆首生擒解京盡法處治該
大臣若能迅奏膚公朕必錫爵酬勳將士等亦同膺
懋賞若曠日持久國法具在朕亦豈能寬宥耶此旨
卽著編諭各營將士俾令奮勉圖功剋期奏捷

初二日

癸卯

翰林院侍講學士馮譽驥奏言臣聞

天津練勇數千類皆膂力趨捷氣質強悍其素
性樂於戰鬥有忘生輕死之心上月賊犯天津

知縣謝子澄率領禦賊該團勇因該縣撫馭有方相率盡力遂能疊挫賊鋒誠使

朝廷優詔褒嘉以作其忠義之氣復懸重賞以激勵之必能得其死命至各路官兵應如何策應如何堵截之處令勝保妥爲籌辦務使羣策羣力同心共濟不得稍爲掣肘以致貽誤事機奏

八

上命軍機大臣傳諭勝保曰前因勇目劉積德幫同官軍殺賊先後諭知勝保查明保奏昨又據勝保奏鄉勇馮玉德能入賊壘探聽虛實是天津練勇均知同仇敵愾奮勇可嘉本日已明降諭旨優予獎勵矣此等驍捷壯勇如能駕馭得宜加以激勸必可助官軍之不足著該大臣與文謙悉心商酌相機調撥或歸文謙統帶或卽令謝子澄帶領來營助剿第未知兵

勇合在一處有無牽掣情形必須妥爲布置善用其長以收實效

上諭內閣曰朕素聞天津地方民心強固所練鄉勇類皆驍健足資禦賊是以疊降諭旨令長蘆鹽政文謙等妥爲激勸使之保衛鄉間九月二十八日逆匪由青縣突竄天津彼時大兵尙未到齊經文謙等督兵截勦該處練勇隨同天津縣知縣謝子澄直前迎殺

擒斬甚多卽雁尸排槍亦足佐官兵槍礮之不逮該
練勇等忠義勇敢洵屬可嘉使各屬地方盡能如此
勦力同心不特自保身家並可上爲朝廷出力何慮
逆氛不靖城守不堅文謙謝子澄平日撫馭得宜亦
可概見著勝保傳旨嘉獎此時賊踞靜海獨流大軍
四面合圍窮寇不難立殄而偵探嚮導尤以本地鄉
勇爲得宜著勝保卽傳旨曉諭明定賞格如該練勇

人等有能隨營帶隊力破賊巢者卽破格保奏優加
賞賚上次天津出力各勇目姓名勞績朕已稔聞儻
能始終奮勉剋期滅賊該大臣等自能仰體朕心有
勞必錄正無慮功績不能上達也

同日吳文鎔奏言據臬司唐樹義稟稱十九日
黎明瞭見賊船五六百隻停泊巴河當派候補
知府伍焯等率帶兵勇分爲四隊由黃州府城

分起進發午刻行近賊船該匪於船上施放槍
礮儘力抗拒我兵佯敗賊果登岸趕來我兵分
三路兜回大進槍礮直前殺賊約百餘名復用
火箭火彈噴筒向賊船拋擲登時燒燬賊船七
十餘隻其排列在後之賊船見岸上賊已潰敗
復率千餘人登岸意將抄襲我兵之後我軍伏
兵四面齊起奮力爭先又斃賊三百餘名該匪

自田家鎮上竄之後沿途搶掠焚劫肆無忌憚
經此次實力痛勦實足以快人心而寒賊膽

吳文鎔又奏言賊現已下竄武漢江面肅清舒
興阿所帶陸路之兵無庸來楚惟皖省情形喫
重似須由豫達皖繞出廬州探明江忠源兵抵
何處與之約會合圖收復安慶府城則皖楚均
可受益奏入

上命軍機大臣傳諭舒興阿曰現在賊匪盤踞皖省非
厚集兵力不足以資剿辦已疊次諭令江忠源星速
赴任皖省情形實屬喫緊舒興阿著毋庸赴楚卽日
帶兵由豫迅往安徽與江忠源會合進剿將安慶郡
城及集賢關桐城等處賊匪迅速剿除以期肅清江
北

上諭內閣曰該匪沿江竄擾經此次痛加懲創賊膽已

寒吳文鎔等務當乘此兵威迅速追剿毋任竄逸候
補知府伍煜前有旨准張亮基將該員調赴山東現
在剿賊得力著仍留湖北以資差委

同日三品卿銜兵科給事中袁甲三奏言准呂
賢基咨稱桐城失守奏請

飭臣督帶兵勇前赴舒城一帶防剿臣查桐城距廬郡
二百餘里自應急圖收復以遏北竄之路惟臣

所帶之兵卽係周天爵駐守固鎮之兵除前次撥歸五百名由奕經安置固鎮外隨營不及八百名復因懷遠告急飭撥三百餘名前往援剿現在存營僅三百餘名賴有本地團練協同捕剿是以聲威尙壯至周天爵從前所招之勇均經遣散臣現帶鄉勇三百餘名係由本處團練內挑選稍資津貼以之近地剿匪則可以之遠

方出征則不可且團練不供征調屢經奉

旨此時若強令從征則凡屬團練均懷疑慮於本地勦
匪大有關礙且前駐臨淮之馬隊官兵現經百
勝等派赴廬州應援若再撤北路兵勇湊赴南
路既於南路無益而北路門戶大開防勦又將
何恃聞舒城一帶團練尙屬整齊惟統率無人
無律之師恐難禦敵查有留皖差委之主事朱

麟祺講求兵法人亦勇敢前在盱眙五河一帶
布置守禦現已回廬應請

飭令該員迅往舒城一帶會同該文武以勦爲防就近
克復桐城必能於事有濟再在籍道員趙昉現
在安慶一帶亦距舒城甚近該員鄉望允協就
近移紮舒城以資督率更爲得力臣奉

旨統籌全局斷不敢稍分畛域而北路空虛太甚設有

貽誤關係非輕謹據實直陳奏入

上命軍機大臣傳諭袁甲三日皖北捻逆肆擾該給事中未能分兵前往自係實在情形著照所請卽飭主事朱麟祺道員趙昉趨程馳赴舒城一帶督率練勇會同地方文武辦理防勦事宜務令桐城及早克復以保廬郡

初三日甲辰向榮奏言總兵德安在東壩督兵防

勦二十一日探聞賊船駛抵高瀆該總兵卽督
率兵勇馳赴迎勦立將賊船衝散二十三日復
有逆船百餘號約四五千人員敢登岸蠶擁而
來意欲撲我營盤卽飛率各營由東門一帶奮
勇迎敵力戰多時該逆相持不退德安首先衝
入賊隊刀砍矛刺賊衆紛紛倒地我兵後隊齊
上橫衝賊陣爲數段該逆見勢不敵四散潰走

兵勇追至南門河下擲放噴筒火彈立燒賊船八十餘隻舟中之賊燒死無數我兵追殺十餘里生擒逆匪九十餘名統計斃賊一千餘人聞該逆尙有大幫船隻停泊蕪湖黃池一帶恐其復來窺伺臣特令鄧紹良仍帶湖南官兵五百名參將長桂帶領廣東兵勇六百名星夜馳往接應以資協剿

向榮又奏言頃臣接奉

諭旨以徐州地居要隘令於和春蘇布通阿二員內揀
派一員馳往接辦查徐宿總扼南北之衝實關
緊要和春沈毅勇敢久歷戰陣自應遵

旨派令前往接統官兵而鎮江爲南路關鍵統帶水陸
各將必須威望素著駕馭有方者乃能勝此重
任蘇布通阿與臣現在計散黨與密通內應未

便更易派往此外鎮將中甚難其選查有已革
提督余萬清歷練老成才識頗優似較諸將略
勝一籌以之統帶鎮江水陸各軍尙屬得宜儘
仍不知振作卽遵照前

旨以軍法從事奏入

上命軍機大臣傳諭向榮曰高瀆賊匪雖經痛勦而大
幫船隻尙在蕪湖黃池一帶正不能不防其窺伺蘇

常復來滋擾該大臣現已嚴飭德安鄧紹良等加意
堵截仍須設法追擊將該匪船隻盡數焚剿萬不可
再令他竄至金陵城中賊情及現在如何籌攻未據
聲敘該大臣擁兵城下半載有餘坐使該逆分擾鄰
疆往來自便是誠何心所稱與蘇布通阿籌商事宜
何時見諸施行卽如鎮江軍務派余萬清前往接辦
該革員如何較勝諸將該大臣有無把握亦未據詳

細具奏著向榮一面密籌克復金陵於該匪思竄各路節節堵截務將元惡大憝設計殲擒其密通內應情事尤須慎重迅速不可稍有洩漏一面剋期攻勦鎮城務令水陸各軍同時並舉俾該逆內外不能兼顧庶可得手並飭余萬清統帶各軍趕早布置建功贖罪不得藉口船礮未齊株守以待儻仍遷延貽誤不能倖邀寬典也

上諭內閣曰高瀆近接東壩爲蘇常門戶該逆乘間竄至卽被官兵痛加焚殺總兵德安帶兵迎勦甚合機宜著交部從優議敘現在向榮復派已革提督鄧紹良帶湖南官兵參將長桂帶廣東兵勇馳往幫同堵截著卽扼要防勦務將逃回蕪湖餘匪儘數殲除其金陵鎮江兩城逆匪日漸窮蹙卽著向榮督率諸將乘勢進攻迅圖克復不准再有耽延

同日許乃釗奏言探得逆船在安徽江面游弋
由蕪湖縣之灣沚地方竄擾黃池查黃池距東
壩百里該逆探悉路徑難保不豕突東壩窺伺
蘇常現值設法徵輸之時儻民間聞警又復驚
惶遷徙餉需更無所出現在向榮已派兵三千
七百名馳往應援但恐東壩下游尙形單薄查
廣東參將長桂所帶潮州兵勇六百名係歷經

聞

戰陣得力之兵現在甫抵上海新牖尙未安營
堪以撥往宜興溧陽一帶迎頭堵截奏入報

初五日

丙午

劉裕鈇奏言十月三十日舒城防剿

之漢中鎮總兵恆興來廬據稱舒城已於二十

九日申刻被匪攻破臣思安省餉乏兵單久邀

聖鑒前因桐城失陷時侍郎呂賢基在舒團練臣於萬

難措手之際籌兵籌餉力圖接濟刻下廬郡僅存鄉勇千名口糧又復不濟危急情形朝不及夕聞新任撫臣江忠源已帶兵二千名來皖於二十七日行抵六安州因感冒風寒在彼暫住頃聞於三十日力疾由六安前至舒城臣擬於初一日委員齎送巡撫關防交江忠源接受一面號召鄉團設法防堵以杜賊匪北竄奏入

上諭曰呂賢基尙無下落實深懸繫該侍郎素懷忠義必能大節無虧恆興又像逃回者若呂賢基已亡恆興豈能使活

上命軍機大臣傳諭江忠源曰前因桐城失陷諭令江忠源等合力進攻茲逆匪復竄舒城偏近廬州情形更爲緊要袁甲三勦辦潁亳一帶土匪勢難兼顧江忠源已抵皖省由六安趕赴舒城著卽督率兵勇剋

期攻勦速殄賊氛該撫忠勇素著屢立戰功朕所倚
異現值防勦緊急之時所帶兵僅二千名不知前募
楚勇能否趕到又聞該撫力疾前進朕心殊深繫念
軍務一切總須酌度緩急相機籌辦劉裕鈐招集團
練設法防堵務當固守廬郡各處要隘呂賢基在舒
城辦理團練尙無下落實深懸繫著卽查明具奏

上又命軍機大臣傳諭舒興阿曰本日據劉裕鈐奏舒

城於上月二十九日失守廬州危急現在江忠源已抵皖省由六安赴舒城惟該撫所帶之兵僅二千名不敷勦辦著舒興阿遵照前旨督兵飛速前進會同江忠源合力進攻保衛廬郡並設法克復舒城桐城安慶等處以期肅清江北遏賊紛竄

上諭內閣曰舒城被匪攻破恆興以專閫大員前因桐城失守業經降旨革職並查明如有退縮逃避等情

卽行正法今旣在舒城防勦何以遽行折回况舒城於二十九日申刻失守恆興於三十日丑刻已至廬郡距失守不過數時顯係奔命逃回似此遇賊退縮畏葸無能之員尙何足惜恆興著卽行正法以肅軍令現在江忠源已帶兵由六安馳赴舒城著該撫卽督飭文武員弁及該處紳勇合力進攻迅圖克復

同日文謙奏言查逆匪攻撲津郡候補道天津

府知府錢忻和候補同知直隸州知州天津縣知縣謝子澄各帶兵勇親身督戰尤爲奮勉且先期募勇保衛津郡民情感戴錢忻和可否

賞戴花翎並加鹽運使銜謝子澄請免補同知直隸州知州以知府用俟直隸軍務告竣再行開缺候補奏入

上諭內閣曰本年九月間賊竄天津逼近府城經文謙

等督率府縣招募練勇晝夜巡防並於梢植口地方
擊退賊匪郡城得以保全天津府知府錢忻和著賞
加鹽運使銜並賞戴花翎天津縣知縣謝子澄著以
知府用並賞戴花翎仍暫留本任俟軍務告竣再行
開缺

同日

上諭內閣曰逆賊竄踞江南三城九閱月矣逞其兇狡

荼毒生靈天地不容神人共憤朕不惜重兵鉅帑救
民水火之中而統兵大臣勦辦遷延致令元惡稽誅
堅城未復朕念及三城百姓遭罹慘劫輒恨將帥之
無能而每聞該士民等忠憤同仇人思自奮又未嘗
不幸民心之大可用也本年四月以來疊據各路奏
報如金陵之四十八社揚州之虹橋紳董皆能同心
勦力協助官兵卽東壩紳士盤獲僞官擊燬賊船六

合等處練勇斃賊至數千之多。餘鳳徐宿之間鄉民殺賊自衛者比比皆是。可見敵愾禦侮忠義自在人心。特恐統兵大臣激勵無方，或臨事不爲援應，或論功不能覈實，以致義憤之民漸生疑慮。在該士民等享國家二百餘年昇平之福，感奮出於至誠。當此逆氛肆擾鄉里，摧殘公義，私讐無不銘心刻骨。逆賊奸詭殘忍，惟以裹脅爲能。爾士民等旣偏近賊蹤，難保

不爲所窘迫不從則受其屠戮從之則自外生成利
害權衡定能熟計近聞三城賊匪勢已窮蹙且糧食
不給專以擄掠爲事克復之機時不可失又聞金陵
百姓有義約布告上江兩縣約定數萬人併力攻城
以義憤之民勦窮蹙之賊揆之天道人心斷無不克
之理功成受賞朕將拭目俟之著通諭江南江北士
民如果能設法破賊克城殲擒逆首倡義之人朕必

優予爵賞其餘亦必破格施恩並將該士民等應完錢漕免徵三年因一人之功推及一鄉因一鄉之功推及一邑諒爾士民亦當同深感奮也至帶兵大臣師久無功朕已屢加譴責所以不卽治罪者尙冀其自知愧奮力贖前愆若敢任聽將弁牽制義民使不得成此大功或功成之後冒竊邀恩一經訪聞法不稍貸如能兵民合力同破賊巢掃穴揜渠互相策應

不特免其遷延之罪仍可同膺懋賞之榮其濱江一帶城鄉村堡強弱不同人心則一儻士民等力能殺賊破船奪其輜重除優加獎勵外仍以所得充賞不准兵弁攘功其人少力微僅能自衛者能將糧食等物收藏嚴密斷賊接濟事平之後亦以功論至逆賊船隻皆自擄掠而來如船戶水手能乘閒燒燬賊船擒殺逆匪自拔來歸者亦准報官論賞總之兵以衛

民民以助兵心貴相聯功不相掩軍營將弁及各屬
士民等務須合力同心盡殲醜類用副朕爲民除害
之至意

初六日丁未勝保奏言臣於初二日丑刻乘夜督

兵進攻各兵冒死向前已越兩濠賊壘槍礮似
雨不能撲進現在探得該逆擬由東路奔竄臣
已疊次嚴囑西凌阿善祿等晝夜加意嚴防勿

令偷竄奏入

上命軍機大臣傳諭勝保曰該逆負隅死守已逾一月若不趕緊剿滅恐賊窮必竄師老則疲又成餘燼復然之勢該大臣膺茲重寄必應密籌全局迅奏膚公以紓朕念現在東南一帶尙覺空虛據稱賊匪欲由東路奔竄雖已嚴飭西凌阿善祿加意防範仍恐兵力不敷德勒克色楞本係幫辦勝保軍務現已諭知

僧格林沁迅飭該貝子赴營協同防剿

上又命軍機大臣傳諭僧格林沁曰現在勝保軍營帶兵需人德勒克色楞係特旨派令幫辦勝保軍務著僧格林沁卽日飭令該貝子迅速前赴梁王莊大營其所帶蒙古馬隊各兵著仍留於僧格林沁軍營以備防堵德勒克色楞務與勝保悉心妥籌布置將獨流靜海兩處逆匪迅卽殄滅無令他竄

同日琦善陳金綬雷以誠慧成福濟奏言查揚
城基廣墉崇一面濱臨運渠三面環以濠塹賊
得恃以爲固幸自礮臺增築後有居高臨下之
勢賊頗驚懼十九日賊由天甯廣儲二門城上
絕下數百人意圖攻撲礮臺臣等督兵迎擊斃
賊數十人賊始敗退東路亦時有賊匪出城窺
伺均經兵勇截擊遁回該逆惟以負固深藏爲

苟延旦夕之計臣等復飭將弁於晝夜礮攻之外加以乘夜暗襲之法昏黑之中賊匪不測我軍多寡城頭開放槍礮徹夜不絕計其所耗火藥亦甚不少二十八日夜間密遣兵丁於北門城濠邊施放火箭過河將賊匪所置擋木延燒殆盡賊匪集衆守陴人聲鼎沸臣等仍飭各礮臺弁兵於賊匪驚怖之時連開巨礮俾增疑懼

一俟賊有可乘之機卽當迅圖克復

琦善陳金綬雷以誠慧成福濟又奏言查瓜州
賊首尹謙吉自經三汊河官兵屢次擊敗未敢
深入赴接近復糾合金陵大股前來接應加以
兩湖調回之黨數逾巨萬設揚城之賊再由南
門奔出深恐南門外官兵及三汊河各營腹背
受敵臣已密飭防守三汊河上下之參將吉連

等極力堵禦毋令瓜州來援之賊得以竄入並
飭副將松齡等帶兵扼守南門以防城內之賊
乘閒竄出臣等又挑選精兵準備迎敵其東路
各門與桂花莊一帶亦由臣雷以誠臣慧成臣
福濟督同晉康查文經妥爲備禦不使賊智得
逞奏入

上諭曰琦善在軍營日久無功若再不將揚州克復盡

殲醜類何顏對朕何顏對天下之人此時鋪張過甚
迫賊竄後何以自解即使盡屬實在情形亦不必如
此鋪張朕總以能否收功爲定斷著琦善等於批摺
到日限於八九日內務須攻破揚城殄滅無遺不准
再令蔓延又滋他患

上命軍機大臣傳諭琦善曰該大臣所陳明攻暗襲各
法均係軍營中應辦之事何必如此鋪張詫爲祕計

著琦善等卽遵批諭依限克復城池使尹逆夥黨勢
孤望絕則續來之逆聞風膽落易於殲擒

初七日

戊申

舒興阿奏言前因豫省毗連楚皖防

剿喫重臣原帶官兵不敷分布奏請酌調綿洵
桂齡等所帶官兵一千七百餘員名來豫差遣
嗣奉

諭旨令臣將陝安鎮總兵郝光甲原帶官兵二千五百

餘員名酌量調回以資進剿當卽飛飭郝光甲
迅速前來茲據郝光甲呈報於本月初八日由
直隸阜城縣奉文折回覈計程途已行抵豫境
臣於此起官兵內飭派五百名令赴歸德府協
防其餘官兵二千餘員名催令郝光甲迅速帶
領兼程來營以資布置奏入

上諭內閣曰已革陝安鎮總兵郝光甲前經派往河南

交舒興阿調遣嗣因該革員帶兵行抵連鎮距靜海甚近經勝保奏令趕赴獨流大營聽候調撥復據勝保奏叅該革員遷延半月之久尙未到營當卽降旨革職仍交勝保差委茲據舒興阿奏稱郝光甲所帶之兵已據呈報於十月初八日由直隸阜城縣奉文折回等語覽奏殊堪詫異該員旣已行抵連鎮何以復行折回旣據稟報未奉勝保飭令赴豫札文何以

又有呈報舒與阿奉文抵豫之說且覈計程途時日種種情節支離實不可解當此軍務喫緊之際豈容此等庸劣畏蒞之員遷延觀望貽誤事機著勝保迅卽查明郝光甲現在逗留何處提訊明確如係捏詞支飾不遵調度著卽遵照前旨以軍法從事毋稍姑息

同日曾國藩奏言臣前奉派兵救援湖北之

旨卽經函商撫臣派令候補知府張丞實候選同知王
鑫管帶湘勇三千前赴湖北尙未啟行連日接
湖北撫臣來函及各處探報均稱賊船於十月
初五以後陸續開赴下游漢陽府縣業經收復
江面肅清武昌解嚴等語則援鄂之師自可稍
緩因思該匪以舟楫爲巢穴以擄掠爲生涯長
江千里任其橫行我兵無敢過而問者前在江

西近在湖北凡傍水城池莫不殘毀皆由舟師未備無可如何今若爲專保省會之計不過數千兵勇即可堅守無虞若爲保衛全楚之計必須多備礮船乃能堵剿兼施夏間奉到

諭旨飭令兩湖督撫籌備舟師經署督臣張亮基造船運礮設法興辦尙未完備忽於九月十三日田家鎮失守一切戰船礮位盡爲賊有現在兩湖

地方無一舟可爲戰艦無一卒能習水師今若
帶勇但赴鄂省則鄂省已無賊矣若馳赴下游
則賊以水去我以陸追不能與之相遇又何能
痛加勦洗再四思維總以辦船爲第一先務臣
現駐衡州卽在衡城試行趕辦俟舟師辦有頭
緒卽行奏明臣親自統帶馳赴下游目下武昌
無賊臣赴鄂之行自可暫緩不特臣不必遽去

卽臣與撫臣商派援鄂之湘勇三千亦可暫緩起程臣已咨明撫臣飭令帶勇之張丞實王鑫無庸啟行如礮船尙未辦齊逆船仍復來鄂則由臣商同督撫隨時斟酌仍專由陸路先行赴援斷不敢有誤事機奏入

上諭曰所慮俱是汝能斟酌緩急甚屬可嘉

欽定剿平粵匪方略卷六十八 癸丑年

十一月初八日己酉江忠源奏言臣於十月十八

日由鄂赴皖兼程前進二十六日抵安徽霍邱縣境之洪家集忽感風寒寒熱交作二十七日力疾行八十餘里酉刻至六安州城病益增劇不得不暫留州城趕緊醫治三十日忽接探報賊於二十九日申刻進陷舒城工部侍郎呂賢

基殉難臣聞信之下痛憤填胸查舒城距廬州
僅百二十里距六安州亦百二十里均爲賊北
竄要途而廬州爲新改省會尤關緊要應卽星
夜趕赴接篆視事以固根本奈連日服藥病勢
轉加萬難就道因就六安連夜布置守城等事
一面飛咨署撫臣劉裕鈐趕緊於廬郡妥爲布
置儻賊由舒至六臣誓與城存亡若由舒至廬

臣亦不敢俟病全愈但能扶掖上輿卽當帶兵
赴援臣受

恩深重正值軍務緊急之時而身遭沈疴焦灼萬狀然
一息尙存誓當竭一息之心力以冀仰答

聖恩於萬一奏入

上命軍機大臣傳諭江忠源曰舒城偏近廬州該撫現
因感受風寒不能前進朕心實深懸繫現當防勦喫

緊之際督辦需人本日已諭令福濟兼程馳赴廬州
六安一帶會同該撫辦理防勦事宜該撫如病已就
痊著卽與福濟相機籌辦務將桐舒等處賊匪併力
殲除斷不可任令北竄舒興阿現在帶兵由陳州赴
皖著催其迅速前進袁甲三現在勦辦捻匪勢難兼
顧廬郡仍著該撫隨時知照該給事中毋令穎亳一
帶捻匪與該逆匪勾結爲患

上又命軍機大臣傳諭福濟曰舒城密邇廬州爲南北
咽喉最關緊要呂賢基業經殉難江忠源復因患病
不能前進袁甲三勦辦潁亳一帶捻匪又未能兼顧
現值勦賊喫緊之際督辦無人恐誤事機著福濟卽
行馳赴廬州六安一帶會同江忠源擇要防勦總期
力挫兇鋒遏賊北竄安徽情形緊急福濟接奉此旨
務卽星速就道萬勿耽延所有揚州灣頭一帶防勦

事宜卽責成慧成與雷以誠等妥籌辦理

上又命軍機大臣傳諭袁甲三曰舒城去廬州僅百餘里現在賊勢猖獗江忠源雖已馳抵六安又值患病不能前進本日已諭令福濟馳赴安徽督辦前據袁甲三奏擬赴蒙懷一帶爲廬郡聲援諒已移營前進著卽擇要駐紮迅籌勦辦毋使土匪與該逆勾結爲患並探明賊蹤如廬州緊急應如何援應之處酌量

辦理

上諭內閣曰前因劉裕鈔奏安徽舒城失守侍郎呂賢基尙無下落朕深知該侍郎素懷忠義必能大節無虧茲據江忠源奏逆匪於十月二十九日攻陷舒城呂賢基殉難呂賢基由翰林科道洊任京卿朕因其品學兼優超擢侍郎本年春閒令其回籍督辦團練頗能實力任事該侍郎年力正強方資倚畀乃以逆

匪窳擾舒城捐軀盡節悼惜殊深呂賢基著追贈尙書銜照尙書例賜卹任內一切處分悉予開復應得卹典該衙門察例具奏伊子編修呂錦文著俟服闋後以侍讀升用所有隨員幕友盡節姓名並著江忠源劉裕鈺確切查明請卹

初九日

庚戌

勝保奏言查靜海獨流相距十八里

有奇西北已添兵嚴防似可無慮惟東面尙覺

空虛臣派令運同劉向贊帶領槍排船隻分列防剿該逆決隄放水護繞賊營使我兵不能進戰靜海城外四面皆水幾無安營之所再四思維惟有於上游築壩遏水使運河斷流方可設法攻取現在賊匪窮極思竄若東南網開一面則此賊必逃獨流靜海必可收復然必須分兵埋伏要路節節截殺大軍緊追自然滅盡而山

東兵力不厚設有漏逸又恐餘燼復燃若必設
法圍困在此殄除又須稍寬時日力籌攻拔
勝保又奏言臣賦性愚直絕少才能深荷

聖明倚畀身非木石能勿銜感然臣能見諒於

君父未必能取悅於僉壬僧格林沁日日差官弁來臣
營盤探聽消息臣出隊時每帶赴陣前指示情
形令其回報復詳加函致咨明奏稿以期諸事

和衷在僧格林沁縱不見疑而其左右僉壬多
係廣西軍營僨事之人未必甘心滿意前月十
一日獨流之戰派令奕紀赴陣前接應奕紀膽
怯未敢身先臣因奕紀善造火器是以僅予申
飭未遽奏參惟不敢妄加保薦自蹈欺飾至山
右遲誤僨事之臣竟似因臣參劾以致褫職又
如屢次

諭令德勒克色楞及達洪阿前來雖斷自

宸衷未必不疑爲臣所請其中難辨情形亦爲達洪阿
奕紀所共曉臣固不敢稍存諉卸致負

生成而此不得已之苦衷不能不據實上陳可否仰求
皇上早加嚴譴以杜僉壬之口俾臣得以帶罪圖效抑
或

簡派親信重臣督率辦理使臣有所稟承之處出自

聖裁奏八

上命軍機大臣傳諭勝保曰朕因勝保勇敢忠誠特命
統領諸軍廓清畿輔責任綦重倚畀至專惟望其迅
殄賊氛拯民水火自逆匪竄踞靜海獨流距京較近
又命僧格林沁駐兵北路爲京師屏障卽爲該大臣
聲援勝保與僧格林沁共辦一事自應不分畛域兩
營聲息時刻相通乃以僧格林沁遣官弁等至營探

聽遽謂爲監察軍情是自疑因以疑人其所見亦甚
狹矣並稱請派親信重臣督率辦理尤屬非是試思
該大臣身爲統帥豈非親信重臣乎朕旣畀以重任
豈復有所猜疑果能奮勉圖功盡殲醜類上慰朕心
下孚衆望悠悠之口何足介意耶現在逆匪勢窮思
竄若伏兵要路誘賊離巢爲截擊之計是否確有把
握儻徒爲收復獨流靜海起見縱令竄逸勦辦更難

得手至所稱於上游築壩洩水斷流以冀剋期滅賊
自係要著務卽趕緊籌辦萬勿再有遲延

同日琦善陳金綬雷以誠慧成福濟奏言前據
儀徵縣知縣都梁森稟稱疊有賊船百餘隻自
金陵順流東駛隨後船隻仍在沿江游駛等語
臣等查此次賊黨赴援數逾巨萬業已分股先
擾浦口勢必會合大股悉赴瓜州而六合儀徵

亦復處處喫緊當經分飭加緊嚴防初二日申
刻果有瓜州賊匪三百餘人由運河東西兩岸
窺探經我兵分投迎擊旋即退回初三日又有
賊匪四五百人由西岸繞至高明寺迤西直對
三汊河官兵營盤意圖攻撲經參將吉連等帶
兵迎擊傷斃賊匪及落水死者約有四五百名
適瞿騰龍德興阿帶兵赴援又經轟斃賊匪四

五百名正在進剿得手之際忽於是日酉刻據報金陵賊匪於初二日申酉間竄至儀徵沙漫洲地方分股登岸哲克東阿張守仁卽帶滿漢官兵連夜前往迎剿初三日巳刻賊匪先撲南門旋撲西門縣城業已失守查該逆竄踞儀邑距揚止數十里道路紛歧四通八達皆爲軍營後路兵丁祇有此數實有防不勝防之勢現將

揚城前後兩路竭力籌堵並飛飭浦口六合等處加意嚴防奏入

上命軍機大臣傳諭琦善陳金綬雷以誠慧成曰金陵賊匪竄至儀徵沙漫洲地方分股登岸縣城旋即失守儀徵距揚城甚近道路紛歧皆爲我兵大營後路形勢最爲緊要該大臣等何竟毫無防範一至於此此時若不趕緊克復儀徵我兵腹背受敵其患何可

勝言著該大臣等迅卽派委大員帶兵馳往勦辦儀
徵失守顯有內應該縣都棨森平素不得民心賊至
並未堵禦現在何處著查明如有逃避情事卽以軍
法從事浦口瓜州賊匪經瞿騰龍等屢次擊退仍著
督飭該總兵等加意嚴防遏賊北竄

十一日

壬子

青麇奏言德安駐城精兵調赴黃州

祇留鄉勇未盡可恃已經咨商督撫可否撥兵

前來以資保衛二十六日據副將駱永忠面稱
該副將奉到督臣吳文鎔嚴札調赴黃州內稱
該副將安坐於無賊之地殊不知德安無兵無
勇搬徙已空賊到恐難保全惟目下情形黃州
較德安尤爲喫重自應令該副將馳赴黃州仍
一面咨商督臣可否撥兵前來抑或將德安本
營兵撥回現未接到咨覆查德安一屬五州縣

四通八達毗連襄豫體察形勢均爲扼要自九月二十二日起無分晝夜臣與該府縣悉心籌畫密爲布置該府縣辦事細心頗資得力昨接河南光山縣函賊有由黃岡偏近光州之勢又信陽州函該處捻匪四起在信陽西北一帶與隨州緊連儻四面賊起雖有重兵已難望其制勝况徵調一空更何所恃儻有疏虞臣能當此

重咎耶奏入

上諭曰所奏實係真情吳文鎔祇知顧一省垣若賊已北竄株守鄂省何益急則治標該督何不知緩急若是

青麀又奏言據探黃州賊匪甚熾前於二十三
四日經唐樹義獲有勝仗賊已回竄不料二十
八日大股直撲黃州兵皆潰散臣又飛札令駱

永忠無論行抵何處一路相機堵剿並飛咨河南撫臣英桂陝甘督臣舒興阿撥兵前來楚豫交界之光州信陽兩處以防北竄奏入

上命軍機大臣傳諭青麀唐樹義曰據奏德安府防兵不敷鄉勇未可盡恃各屬處處喫緊自係實在情形惟據稱黃州較德安尤爲喫重駱永忠之兵不能不令其馳赴是該學政續接探報已深悉巴河一帶賊

情緊急湖北兵力之單不獨德安一處當賊擾孝感時固須嚴扼該郡以杜北竄之賊今賊已下竄自應撥兵跟剿吳文鎔若祇顧省垣誠屬不知緩急惟移兵就賊亦自應先其所急其賊由黃岡偏近光州一節黃岡距光州二百餘里既有唐樹義帶兵在彼諒不至遽形偏近本日已諭知英桂於楚豫交界一律嚴防安徽情形亦甚緊要舒興阿已令星馳赴皖此

時當已由陳州起程勢不能再令折回所有楚豫接壤地方如何防剿之處該學政即可隨時知照英桂相機妥辦駱永忠所帶之兵現已調赴黃州卽著唐樹義督帶兵勇緊躡賊蹤盡力追殺毋使再行回竄

上又命軍機大臣傳諭吳文鎔崇綸曰前據吳文鎔奏賊船停泊黃州省城未可撤防本日復據青麇奏德安精兵調空鄉勇未盡可恃是該督與該學政一則

防賊回竄一則慮賊旁擾均係就所駐之地而言此時巴河一帶賊蹤蟻聚自以急勦黃州爲尤要現在青麇已飭副將駱永忠馳赴黃州本日復傳諭唐樹義盡力跟勦著該督等悉心體察如防城兵勇尙可分撥卽行酌量調往庶可得力其德安府城係北連豫省之地亦關緊要已諭知青麇妥爲防守

上又命軍機大臣傳諭舒興阿曰前經疊降諭旨令舒

興阿馳往安徽會同江忠源勦辦逆匪未據該督奏
報何日抵皖昨因呂賢基殉節江忠源因病尙在六
安賊氛偏近廬州已令福濟馳赴該處督辦防勦惟
揚州尙未攻克儀徵又復失守福濟之能否分身前
往尙不可知河南雖界連楚皖惟楚北賊蹤已經下
竄唐樹義帶兵跟蹤追擊該匪必順流而南設與皖
省匪從彙爲大股北向奔突不但廬州可危卽穎鳳

蒙亳一帶皆係曾被蹂躪之區兵勇無多人心未固
擒匪復時常出沒儻經該逆勾結肆擾勢將不可撲
滅惟有趁其未至廬州迅速帶兵前往力遏賊鋒方
可設法收復舒城桐城安慶等處該督前奏以陳州
歸德光州各屬毗連皖境因請駐守陳州是藉防堵
爲名置兵於無賊之地於事勢緩急道途險易絕不
一加忖度是誠何心賊情剽疾異常我兵遷延愈甚

近來統兵大臣率蹈此種惡習舒興阿乃亦出此實
所不解著該督於接奉此旨後卽日兼程馳抵廬州
與江忠源迅籌攻勦其皖豫交界各處均在穎亳後
路大兵經行便可隨處察度兼顧不得因已派福濟
帶兵應援遂觀望不前徒糜軍餉儘因該督赴皖遲
延以致賊蹤北竄朕豈能置舒興阿於不問耶本日
據青廉奏咨商該督撥兵防堵信陽光州各要隘已

諭知英桂就近酌量派防矣

上又命軍機大臣傳諭英桂曰本日青麋奏據光山縣稟報賊由黃岡偏近光州又信陽州密函該處捻匪四起在信陽西北一帶與隨州緊連是光州信陽等處均屬最關緊要信陽僅有派防兵勇一千餘名實形單薄該撫前奏卽咨明舒興阿迅飭甘肅遊擊王定莖帶兵馳往信陽擇要駐守目下是否已到著英

桂嚴飭南汝光道會同各帶兵將弁將該處各要隘
認真防堵並飭光州所屬嚴密設防無令楚北賊匪
闖入豫境仍派委妥員將黃河口岸認真巡查密防
奸細偷渡舒興阿現已馳赴皖省豫境防勦事宜該
撫責無旁貸務當竭力妥籌無稍貽誤

十二日

癸丑

怡良詳乃釗奏言

臣

等接准向榮咨

會遵

旨飭令和春前往徐州另派已革提督余萬清接統鎮
江水陸諸軍等語查鎮江爲蘇杭屏蔽關繫綦
重鎮江逆匪無時不思竄突前提督鄧紹良雖
稱勇敢尙有支持不住之時幸和春洞悉賊情
接任後籌備周密賊匪屢次衝突無不痛勦截
回近日逆匪潛通常州土匪欲圖內應經和春
搜獲逆信密拏黨與絕其詭謀且威望素著軍

民信服邇日餉需不繼各營兵勇不免嘔有煩
言和春恩威並濟頗能鎮服若一經更易生手
恐軍心未能鎮定逆匪乘隙鷓張蘇常及杭嘉
一帶均不堪設想是此時鎮江情形十分緊要
臨敵易將兵家所忌實不宜驟令和春離開鎮
江且黃池一帶時有賊船出沒蘇省紳民一聞
和春赴徐州之信無不惶惑臣等馳函會商意

見符合謹據實瀝陳伏懇

天恩俯念鎮江地方緊要仍令署提督和春一手經理
其徐州軍營可否

飭下向榮察看已革提督余萬清是否堪以派赴徐州
之處伏候

命下遵行

同日署禮部左侍郎光祿寺卿宋晉奏言查逆

匪現陷舒城漸偪廬郡難保其不窺伺北方侍郎呂賢基已經殉難新任巡撫江忠源又復患病惟丁憂侍郎曾國藩忠誠素著瞻識俱優在湖南辦理團練屢次派勇接濟江忠源是其鄉望素孚人皆樂爲效用具有明徵可否

飭令挑選練勇乘船順流東下與江忠源水陸夾擊以冀速殄賊氛如能將皖省沿江賊船大加剷洗

則金陵揚鎮之賊必皆膽落向榮等自可共圖
克復至曾國藩現雖丁憂然縑墨從戎古人無
避當此軍務緊急尤當以

國事爲重如蒙

特旨飭令前來該侍郎諒不至推諉也

宋晉又奏言現在江南賊匪四出竄擾總由江
面爲其所踞一任豕突狼奔難於處處嚴堵惟

有添調廣東紅單船速赴江南以期掃除三城
盤踞之賊請

特諭伍崇曜迅再添募紅單船百號剋期前來江南勦
賊不可稍有遲緩至督帶艇船尤須爲廣東義
勇推信之人始能得力查丁憂給事中蘇廷魁
謀略深沈忠款篤至粵省紳士羣爲推許可否
飭令督帶廣船迅駛入江奮力勦洗如此布置則曾國

藩帶勇自上流而來蘇廷魁率船自下游而至
兩面夾擊不患江面賊氛之不悉就蕩平也

宋晉又奏言東壩爲蘇省咽喉現在下竄賊匪
雖經擊退難保不蟻聚復來似應設法固守以
圖萬全可否

飭下向榮於壩口一帶沿岸數丈外我軍槍礮能及之
處排立木椿四重於水內連以鐵索以拒賊船

並於岸上連築木城護以土牆中開礮孔以便
轟擊如此布置則水有木椿賊船不能前進陸
有槍礮賊船不得停留更有木城遮護我能傷
賊賊不能傷我以逸待勞卽可以寡敵衆均奏

入

上命軍機大臣傳諭向榮怡良許乃釗曰前據向榮奏
遵派和春馳往徐州所有鎮江軍務卽委余萬清接

辦茲據怡良許乃釗奏稱鎮江地方緊要斷非生手所能接辦請仍令提督和春一手經理自係實在情形和春著仍留鎮江統帶水陸諸軍以資籌勦該大臣等卽責成該提督迅速克復鎮江無稍延緩余萬清著卽飭令渡江交江忠源酌量差遣本日據宋晉奏東壩爲蘇省咽喉請於壩口一帶立木椿木城以資守禦等語如此布置能否得力著該大臣等酌度

辦理

又命軍機大臣傳諭葉名琛柏貴曰前有旨令葉名琛等於廣東雇覓海船馳赴江南並令與候補道伍崇曜商酌雇覓茲據宋晉奏請特諭伍崇曜再添募紅單船百號剋期前赴江南助剿並稱丁憂給事中蘇廷魁可以帶船入江等語江南賊匪四出竄擾總由江面爲其所踞若此項船隻果能雇備妥速駛行

入江則三城盤踞之賊自不難一鼓蕩平著葉名琛
給貴與伍崇曜悉心商酌迅速辦理俟辦有成數卽
著選派得力將弁或令蘇廷魁管帶由海入江以資
勦洗該員等果能辦成此事肅清江面自當破格酬
庸渥加恩賞也

上又命軍機大臣傳諭曾國藩曰現在安徽逆匪勢甚
披猖連陷桐城舒城偏近廬郡呂賢基已經殉難江

忠源又復患病暫駐六安不能前進總由江面無水
師戰船攔截追剿任令賊船往來自如以致逆匪日
肆臨張該侍郎前奏亦曾籌慮及此著卽趕辦船隻
礮位並將前募楚勇六千由該侍郎統帶自洞庭湖
駛入大江順流東下直赴安徽江面與江忠源會合
水陸夾擊以期收復安慶及桐舒等城並可牽制賊
匪北竄之路現在廣東紅單船數十隻計已由閩入

江又有艇船數十隻均可備夾擊之用該侍郎忠誠素著兼有膽識朕所素知諒必能統籌全局不負委任也

同日

上命軍機大臣傳諭僧格林沁曰朕聞已革前任九江道士魁現在該大臣軍營該革員前在賽尙阿軍營狡詐貪鄙大煽威柄以致物議沸騰今復隨該大臣

馬步賊隊千餘名從東南撲來暗襲我兵之後
獨流之賊又分四路擁出逆眾三四千名分撲
我兵隊伍臣聞報靜海賊至卽令達洪阿抵禦
獨流賊匪臣督兵迎擊靜海匪股復督飭托雲
保魁福馬隊及正定步隊由隄岸抄擊該逆見
我兵兩路衝截遂一齊敗回靜海而獨流壘中
之賊愈出愈多達洪阿等極力擊殺殲斃無數

賊猶死戰不退臣卽商令德勒克色楞暫行督陣臣單騎馳繞北隄令健銳營出奇兵從賊後抄擊賊遂大敗川勇及天津各勇並健銳火器營兵奮勇掩殺復飭佟鑑速用神威礮連環轟擊隄面冰坑賊屍填積逆衆奔回木壘我兵隨追隨殺直抵濠邊此次斃賊千有餘名實足大快人心臣細探賊營糧米祇敷數日若不使之

竄逸內潰外攻蕩平立待惟各路防兵或千餘
或數百如遇賊匪全股突出終覺力薄西路雖
節節派兵布置而不免畛域各分深恐一處疏
虞敗壞全局所有西北西南一路應請

飭令慶祺就近酌辦如鎮將不遵調度咨明嚴辦奏入
上命軍機大臣傳諭勝保曰逆匪窮蹙已極我兵攻勦
愈力該逆必思他竄該大臣洞悉賊情自能節節布

置無待朕之諄囑所稱西路官兵不免稍存畛域請
旨責成慶祺嚴防已諭知僧格林沁傳知該侍郎遵
辦勝保統領全軍一切調度各營自應遵照著卽傳
旨諭知慶祺盡力堵截如大兵攻拔賊壘逆匪或從
西路竄逸不但將不遵調度之鎮將從重治罪卽慶
祺亦不能辭咎也

上又命軍機大臣傳諭僧格林沁曰勝保勦辦靜海獨

流兩處賊匪獲勝逆勢窮蹙已極自不難立就殄滅
北路一帶經僧格林沁防堵周妥惟西路一帶似尙
不甚可靠現在慶祺紮營正在獨流西面著僧格林
沁卽行傳旨諭知該侍郎酌度緩急嚴飭西路各營
鎮將悉力堵截儻有防範不嚴被賊竄逸情事朕不
但將不遵調度之鎮將從重治罪卽慶祺亦不能辭
咎也

同日琦善陳金綬雷以誠慧成福濟奏言初四日辰刻賊匪由南門突出四五千人分三大股衝突副都統薩炳阿督率協領富呢雅杭阿等督帶馬步各隊設伏以待逮賊衆已過四方石及礮臺約一里許官兵槍礮弓箭齊發賊衆大敗回城計殺斃賊匪五百餘名生擒賊匪十七名是日瓜州大股之賊率衆逾萬復至三汊河

瞿騰龍德興阿督率參將吉連等開放大礮擊
沈賊船一隻淹斃十餘名賊又從盧家州地方
傍隄西竄經瞿騰龍德興阿等分兵追勦兩面
夾擊始行遁回初六日賊匪復出南門甫過礮
臺德興阿松齡等卽整隊掩擊賊匪急遁入城
初七日清晨賊由儀徵循河東行至樸樹灣約
數千人德興阿親督馬隊抄擊瞿騰龍率步隊

迎勦其時城內之賊復由南門竄出由八里鋪
至上游窺伺均經官兵分投擊回臣等伏查此
時揚城之賊急圖突圍而出復有瓜州之賊糾
合金陵鎮江大股由瓜州分道來援儀徵之賊
又復分股接應賊數愈增官兵更形單薄當此
萬分喫緊之際臣等惟有悉心籌畫合力防維
以期及早克復奏入

上命軍機大臣傳諭琦善陳金綬雷以誠慧成曰此時
皖境賊氛愈熾南岸江鎮兩城亦收復無期朕心焦
灼該大臣豈不知之稍有天良亦當感愧思奮現在
大兵萃聚揚州如先將郡城克復則儀徵瓜州自必
勢如破竹該大臣等擬如何進攻當有成算疊次所
降諭旨責備成全均有深意儘再因循日久國法具
在不能曲宥也

上諭內閣曰此次揚城之賊急圖突圍而出瓜州之賊復糾合大股分道來援又有儀徵賊衆接應悉經官兵迎勦抄擊匪勢不支若再不乘勝籌攻將揚州與儀徵剋日收復並將瓜州地方賊匪迅速掃除該處生民久罹鋒鏑朕心寢饋難安該大臣等其勦力同心迅將此股逆賊殲擒淨盡以慰朕念正不在以逐日小有斬獲徒勞奏牘也

同日台湧奏言十一月初四日接崇綸函咨賊
匪尙未盡出楚境黃州巴河上下豈可任其久
踞急應痛剿以絕根株臣卽將前選滿兵二
千名統帶赴省等因查巴河對岸一帶係由大
冶通山崇蒲等縣入荆捷徑該匪於武漢下竄
未遠復又逆流上駛似此詭詐行蹤難保非以
荊州名勝之區冀圖擄掠而駐防荊州城內滿

兵僅餘二千有奇若將派防之滿兵全行拔營
赴省誠恐該匪乘虛而入不免有顧此失彼之
虞又前於十月十七日准湖廣督臣吳文鎔函
咨囑臣既回荊州自可不必來省如賊船回竄
省城警急再爲飛咨帶兵前來等因自未便遽
行帶兵起程該匪現復擾踞黃州是襄郡地方
尤宜豫爲防範臣擬將前調之提鄖二標兵一

千三百名令遊擊翟萬林統帶赴襄會同襄陽道羅遵殿相度設防用固人心臣現署提督全省大局均應籌畫所有現在應否卽行統帶滿兵赴省並添漢兵派防襄陽之處候

旨遵行奏入

上命軍機大臣傳諭台湧曰前經降旨令台湧擇要截勦與吳文鎔等互爲聲援茲據該將軍奏稱應否帶

兵赴省並添兵派防襄陽請旨定奪軍情變幻靡常全在酌量緩急相機布置若必事事請旨施行則往返數千里接奉諭旨之時情形又各不同豈可稍涉拘泥目下楚省情形黃州最爲警急武昌稍可從緩襄陽等處亦應豫爲防範所請將提鄖兩標兵一千三百名令遊擊翟萬林帶赴襄陽著卽嚴飭該遊擊會同安襄鄖荆道羅遵殿實力籌防無稍疏懈總之

武昌省城與荆襄均關緊要該將軍現署提督惟當
統籌全局與吳文鎔崇綸協力同心先其所急不可
稍分畛域

上又命軍機大臣傳諭吳文鎔崇綸曰本日據台湧奏
崇綸函咨該將軍赴省合勦吳文鎔又函咨無庸赴
省辦理似屬兩歧請旨定奪已降旨令台湧酌度情
形先其所急不必事事請旨矣現在巴河一帶賊船

蟻聚該督等自以急勦黃州逆匪爲尤要台湧所選
滿兵二千如能統帶前往自可協力助勦惟荊州爲
楚西重鎮若將派防滿洲官兵全行調撥出境萬一
逆匪乘虛竄入貽誤非輕以目下情形而論所有台
湧前選滿洲官兵二千自應駐紮荊州以資防守軍
情變幻旦夕不同著吳文鎔崇綸體察情形隨時知
照台湧互相策應總之省垣防守與荆襄等處均屬

緊要該督等務與台湧協力同心妥籌布置不可稍
分畛域